

Tong yulduzi

Vatan yagonadir,
Vatan bittadir!

N:15 (67180)
2018-yil 9-aprel

www.tongyulduzi.uz


Gazeta 1929-yil 1-avgustdan chiqa boshlagan

O'zbekiston Respublikasi bolalar va o'smirlar gazetasi

ISSN - 2010-6092

BUGUN AMIR TEMUR TAVALLUD TOPGAN KUN!

KOMANDIRDAN XAT KELDI



Yaqinda ta'lim maskanimizda quvonchli voqea bo'ldi. Ishonasizmi, maktabimiz rahbari nomiga Qashqadaryo viloyati, G'uzor tumani, Pachkamar qo'rg'onidagi harbiy qism komandiridan minnatdorlik maktubi keldi. Xatni direktorimiz R. Sultonova tantanali tadbirida o'qib berdi. Unda shunday so'zlar bor edi:

«Qadrli 44-umumta'lim maktabi jamoasi! Sizning ta'lim dargohingizda o'qigan va tarbiya olgan mayor Sanjarbek Rahmonov o'z yigitlik burchini o'tab, Vatan sarhadlarini a'lo darajada qo'riqlamoqda. Yosh avlodni vatanparvarlik ruhida tarbiyalashda fidoyilik ko'rsatayotgan maktab ustoz va murabbiylariga qism qo'mondonligi nomidan o'z minnatdorligimizni bildiramiz.

Hurmat bilan,
podpolkovnik
N. MAHMUDOV».

Ushbu maktub har bir o'quvchi qalbini to'lqinlantirib yubordi. Qadrdon maktabimizga bundan keyin ham faqat «rahmat»lar aytiladi, albatta.

Dilnura JO'RAYEVA,
Saidaxon AZIMJONOVA,
Andijon viloyati, Baliqchi
tumanidagi 44-umumta'lim
maktabining 7-«B» sinf
o'quvchilari

Poytaxtlik aka-uka Fuzayl va Fayoz Mirjalolovlar Temuriylar tarixi davlat muzeyidagi eksponatlardan hayratga tushdi. Alisher Navoiy nomidagi Toshkent davlat o'zbek tili va adabiyoti universitetining talabalari esa bobomiz haqida o'qiganlarini ularga so'zlab berdi. O'zlari ham Amir Temur haqida yangi bilimlarga ega bo'ldi.

«Bilagi zo'r birni yiqar,
Bilimi zo'r - mingni».

Amir TEMUR

Tong
yulduzi

AMIR TEMUR

KITOBNI SEVAR EDI

Chindan

ham shunday, aziz yosh do'stlarim!

Sohibqiron Amir Temur kitobni insoniyatga berilgan buyuk ne'matlardan biri, deb bilar va ilm ahlini, kitob o'qigan odamni juda e'zozlar edi. Olimlar bilan esa taxtdan tushib, uzoq va ko'p suhbat qurar edi.

Demak, bugun Siz bilan Amir Temur va uning kitobga bo'lgan mehri haqida suhbatlashamiz. Sababi, bu gazeta orqali Sizlar bilan Sohobqiron bobongiz hayot yo'li to'g'risida juda ko'p gaplashganmiz. Inchunun, takrardan ko'ra, bugun aynan kitob haqida suhbat qursak, sizga ham, bizga ham foyda bo'ladi, deb o'ylayman.

Avvalo, shuni bilingki, Temurbek cho'lda yoki tog'-u tosh ichida emas, ilm gurkirab rivojlangan yurtida, ma'rifatli el orasida ulg'aygan.

Elimizning ulug'ligi haqida bir misol:

XI asrda yurtimizga kelgan arab allomasi Abulqosim ibn Havqal bunday deb yozgan: «Movarounnahr xalqining javonmardligi darajasi juda yuksakdir, ular o'zlarini xuddi bir hovli-bog'da yashayotg'onday tuturlar. Qay biri boshqasi xonadonig'a tashrif buyursa, o'zini xuddi o'z uyiga kirganday his etur. Bag'oyat mehmondo'stdurlar, tunda keladurg'on mehmondan aslo xijolat chekmaydurlar. Mehmonni tanimasalar-da, hech bir to'lov-mukofot tilamay, mehmonnavozlik aylayurlar...».

Ana shunday buyuk xalq orasidan yetishib chiqqan Temurbek yoshlikdan chavandozlik, qilichbozlik, suvda suzish, kurash tushish mashqlari bilan tanasini chiniqtirgan bo'lsa, ilm bilan o'zini ziynatladi va u hech qachon uch marotaba qo'l yuvmasdan turib, kitobni ushlar edi.

Yosh do'stlarim, biz tarixiy voqealarning eng yaxshilaridan saboq olamiz, yomonlaridan xulosa chiqaramiz va salbiy xislatlardan uzoq bo'lamiz. Lekin tarix ko'chadagi mish-mishlarga asoslanmaydi, aksincha, aniq manbalarga suyanadi. Keling, Siz bilan biz ham ana

shunga amal qilgan holda bir tarixchining so'zlariga quloq tutaylik.

Pokistonlik tarixchi olim Ahmad Hasan Domiy o'zining «Timur Legacy» («Temur merosi») kitobida shunday yozgan:

«Amir Temur zamonida hatto urushlar davom etayotgan davrlarda ham adabiyot to'sqinliklarga uchramagan.

Adabiyotga bo'lgan o'ta ishtiyoq va sodiqlik, yozuvchi va shoirlar ijodiga homiylik qilish odat tusiga kirgan edi».

Shu bois ham, o'sha zamonlarda adabiyot gurkirab, rivojlangan edi.

Kitobda Amir Temurning homiyligida ko'plab shoir va yozuvchilarning ijod etgani qayd etilib, misol tariqasida ulardan o'n nafarining ism-sharifi sanab o'tilgan: bulardan sherozlik Shamsiddin Muhammad Nafis, xo'jandlik Kamoliddin ibn Mas'ud va Ubayd Zakoniy, Imomiddin Faqih, Jamoliddin Muhammad Salmon ibn Olouddin Muhammad, Faxriddin Mahmud ibn Amir Yaminiddin Turg'atlaridir.

Quyidagi voqea ham juda mashhur va u jahon temurshunos adiblari va olimlarining juda ko'p asarlarida naqsh etilgan. Biz ham uni sizlarga havola etmoqdamiz: bilmaganlar o'qib, ofarin, desinlar, bilganlar yana takror ko'z yugurtirsinlar, ilmning takrori hamisha foydadir.

Temurbekning 14 yoshida Kesh shahridagi Abdulla Qutb madrasasida tahsil ola boshlagani haqida ma'lumotlar mavjud. Ana shu yerda u boshqa mashhur asarlar kabi ozarbayjonlik shoir Mahmud Shabistariyning «Gulshani roz» («Sirlar gulshani») kitobini ham yod olgan edi.

Oradan yillar o'tib, Turon sultoni Amir Temur Ozarbayjondan o'tayotganda, Shabistar degan qishloq diqqatini tortadi. Uning buyrug'iga ko'ra, qishloq haqida surishtirib ko'rganlarida, haqiqatan ham shoir Mahmud Shabistariyning shu yerda yashaganligi aniqlanadi va shoirlarning qabri ham shu yerda ekanligi ma'lum bo'ladi.

Amir Temur garchi vaqti tig'iz bo'lsa-da, shoir xotirasi hurmati uchun uning qarovsiz qabrini borib ko'radi va Qur'on tilovat qiladi hamda maxsus farmon berib, u yerda mo'jaz maqbara

«Kitob barcha bunyodkorlik, yaratuvchilik va aql-idrokning, ilm-u donishning asosidir. Hayotni o'rgatuvchi murabbiydir», degan edi u.

qurdiradi. Qishloqda istiqomat qilayotgan 3891 nafar kishiga 5 misqoldan oltin ulashadi. Bir misqol oltinning 5 grammga to'g'ri kelishini hisoblab chiqsak, bu umumiy hisobda 19455 gramm, ya'ni qariyb 20 kilo oltin demakdir.

Endi yosh do'stlarim, shunday ulug' zotning farzandlari, nevara-chevaralari qanday bo'lishgan? Bu to'g'rida ham birgina misol:

«Said Imod Xuboiziy fozil va xushta'b kishi edi. U mana bularni hikoya qiladi:

Mirzo Ulug'bekning majlislaridan birida Firdavsiyning «Shohnoma»si o'qildi.

Movarounnahrlik bir odam «Shohnoma»ni mirzo, uning yaqinlari va mahramlariga yoqmaydigan bir ohangda o'qidi. Mirzo menga murojaat qilib: «Ushbu so'z aslida qayerdan kelib chiqqan?» deb so'radilar. «Xurosondan chiqqan», deb javob berdim. Boyagi movarounnahrliklar: «Ha, xurosonliklar o'z majlislarida shunday talaffuz qiladilar», dedi.

Men so'zimdada davom etib: «Xurosonda biron she'rni yoki boshqa narsani o'qiganlarida, buzib o'qiydilar, masalan, «Zafar askan» (Zafar maskani) so'zini «zafarboz» (zafar o'yini) deb o'qiydilar», dedim.

Mirzo javobimdan mamnun bo'ldilar va kaminaga xos choponlaridan in'om qilib: «Minba'd mening huzurimda «Shohnoma» bunaqa buzib o'qilmasin!» dedilar».

Xo'sh, Sohobqiron Amir Temur hamda u zotning avlodlari shunday ulug' insonlar o'tgan ekan, **chet ellik tengdoshlaringiz ular haqida qanday fikrdalar?**

Bu o'rinda Rossiyada nashr etilayotgan «Nauka i jizn» jurnali Qunduzcha shahrida istiqomat qilayotgan 10-sinf o'quvchisi S.Arnooldovning «Amir Temur va To'xtamishxon jangi» maqolasi uchun yillik mukofot sohibi sifatida taqdirlaganini yorqin misol qilib keltirish mumkin. O'ylaymizki, Sizlar ham ulug' bobolarimiz haqida ana shunday o'tli maqolalar yozib, biz kattalarni qoyil qilasiz.

Ana endi, ilm-fan homiysi, kitob shaydosi bo'lgan Amir Temur bobongiz davrida yurtingiz qay darajada gulab-yashnagan?

Bu haqda Sohobqiron bobongiz yaxshi ko'rgan tarixchi Nizomiddin Shomiyning «Zafarnoma» kitobidan o'qiyimiz: «Asrlar mobaynida hali biror talabgorning ahd-u

nihokiga kirmagan ikki bo'y yetgan go'zaldek bo'lmish Eron-u Turon mamlakatlari (Amir Sohobqiron) adolatli siyosat yuritish orqali shunday boshqarmoqdaki, u yerlarning siyosati o'rnatilgan kunlarda Movarounnahrning eng chekka joylaridagina emas, balki Xitoy va Xo'tan chegarasidan Dehli va Kanboyit atroflarigacha (Hindiston yarim oroli shimoli-g'arbida joylashgan bandargoh), Bob-ul-abvobdan («Darvozalar darvozasi»), ya'ni Kavkaz tizmasining sharqiy qismida Dari al-darasida joylashgan qal'a) to Misr va Rum hududigacha bo'lgan yerlardan savdogarlar u yoqda tursin, bolalar-u beva xotinlar ham ipakli matolar, oltin-kumush va eng zarif tijorat mollarini keltiradilar va olib ketadilar. Hech bir kimsa ularning bir doniga ham ko'z olaytira olmaydi va bir dirhamiga ham ziyon yetkazmaydi. Bu cheksiz ne'mat va poyonsiz marhamatlar Amir Sohobqironning siyosati va adolati natijasidir».

Aziz o'quvchilar! Sizga vazifa:

Bu maqoladan qanday taassurot oldingiz?

Alisher Navoiy bobongizning quyidagi so'zlarini qanday izohlaysiz?

«Temur Ko'ragon – agarchi nazm aytmoqqa iltifot qilmaydurlar, ammo nazm va nasmi andoq xo'b mahal va mavqeda o'qibdurlarkim, aningdek, bir bayt o'qig'oni ming yaxshi bayt aytqonicha bor».

Shuni unutmangki, hech kimning ezgu mehnati aro yo'lda qolib ketmaydi. Oldindan aytishim kerakki, eng yaxshi javob yo'llagan o'quvchilarga Amir Temur haqidagi kitoblarimdan jo'natishga va'da beraman. Demak, xatlaringizni kutamiz va ular, albatta, gazeta orqali e'lon qilib boriladi.

**Hurmat bilan sizni yaxshi ko'ruvchi:
To'liqin HAYIT,
O'zbekiston Respublikasida xizmat ko'rsatgan madaniyat xodimi**

MAKTABIMIZ «QALB»I

Yangi maqola yozishga kirisharkanman, tengdoshlarimning ustozlari haqida kam fikr bildirishlari haqida o'ylab qoldim. Shu bois, bugun ta'lim maskanimizning ma'naviy-ma'rifiy ishlar bo'yicha direktor o'rinbosari Dilafro'z Razzoqova haqida yozmoqchiman.

Ustozimizni maktabimizdagi barcha o'quvchilar hurmat qiladi. Men ham Dilafro'z muallimni ikkinchi volidamday yaxshi ko'raman. Ular esa kamtarlik bilan mehnat qilishdan tolmaydilar. Ustoz bilan tanishuvimiz geografiya darsida bo'lgan. Ayrim o'qituvchilardan farqli o'laroq, ular mavzuni o'quvchilarga hayotiy misollar bilan yetkazib beradi. Hatto fanni past o'zlashtiruvchi sinfdoshlarimiz ham darsdan olam-olam taassurot oladi. Murakkab mavzularni o'tayotganida esa biroz miyamizga dam berib, turli sport o'yinlari yoki hazil-mutoyiba bilan kayfiyatimizni ko'taradi.

Keyinchalik ularni ma'naviyat targ'ibotchisi sifatida ham kashf etdim. Bir kuni o'g'il bolalar o'rtasida nizo chiqib, vaziyat mushlashuvigacha yetib bordi. U kishi tarbiyaviy soat o'tkazib, shunday savol berdi:
– Bolalar, bilasizmi, osmondan quyoshdan million marta ulkan sayyoralar o'z o'qi atrofida vazmin suzmoqda. Nega biz yer bag'rida tinch yashay olmaymiz?

Savolga hech kim javob bera olmagan bo'lsa-da, barcha o'z vijdoni oldida hisob berib bo'lgandi.

Dilafro'z opa biz o'quvchilarga juda mehribon. Shu sababdan ham bugun o'quv dargohimizda iste'dodli tengdoshlarim katta yutuqlarga erishmoqda. So'zim so'nggida yana bir haqiqatni o'ylab qoldim. Ustozimga o'quvchilar tomonidan berilgan unvonlar ko'p ekan: «Fidoiy ustoz», «Maktabimiz qalbi»...

Men shunday muallimning qo'lida tahsil olayotganimdan faxrlanaman.

Otabek BAKIROV,
Toshkent viloyati, Angren shahridagi
27-umumta'lim maktabining 10-sinf o'quvchisi

Yaqin-
da Angren shahridagi
7-umumta'lim maktabida «Bilimlar
bellashuvi»ning shahar bosqichi bo'lib
o'tdi. Bellashuvda 5-8-sinflarda tahsil
olayotgan 1 344 nafar o'quvchi
ishtirok etdi.

Ona tili va adabiyot fanidan 43-umumta'lim maktabining 5-sinf o'quvchisi Jasmina Abdurasulova, 26-umumta'lim maktabining 6-sinf o'quvchisi Dildora



BILIMDONLAR BELLASHGANDA



Hakimjonova, 2-umumta'lim maktabining 7-sinf o'quvchisi Mohinabonu Fayzulayeva, 7-umumta'lim maktabidan 8-sinf o'quvchisi Dilnavoz Safarova, o'zbek tili fanidan 17-umumta'lim maktabining 5-sinf o'quvchisi Sabrina Abdumajidova, 10-umumta'lim maktabidan 6-sinf o'quvchisi Shahlo Abdusattorova, 22-umumta'lim maktabidan 8-sinf o'quvchisi Sevinch Omonaliyeva kabi o'ndan ortiq bilimdon o'quvchilar fanlar kesimida yuqori ballni qo'lga kiritib, birinchilardan bo'lishdi.

– Ilmni qanchalik ko'p olgan sari, u ozdek bo'lib tuyulaveradi, – deydi 26-umumta'lim maktabining 6-sinf o'quvchisi Dildora Hakimjonova. – Bilimdonlarga o'qish-o'rganishdan charchamang, degim keladi.

QUVONCHIM CHEKSIZ

Men «Tong yulduzi» gazetasini 3-sinfdan buyon muntazam o'qib kelaman.

Sevimli nashrimga har yili obuna bo'laman. Gazetada e'lon qilingan «Onajonim tabiat» insholar tanlovida g'olib bo'lganman. Shuningdek, «Nurli manzillar», «Yechim» kabi insho va ertaklarim ham chop etilgan. Shu tariqa bu gazeta mening eng yaqin do'stinga aylangan. Yaqinda «Go'zal ko'klam» nomli birinchi she'riy kitobim bosmadan chiqdi. Meni ijodga qiziqtirgan, qo'limga qalam olishga chorlagan qardron gazetamdan minnatdorman.

Gulasal BAXTIYOROVA,
Xorazm viloyati, Xonqa tumanidagi
40-umumta'lim maktabining 5-«D» sinf o'quvchisi



BO'LDI AJOYIB BAYRAM, TAASSUROTULAR BIR OLAM

Bir kuni olimlar «Dunyodagi eng buyuk ixtiro nima?» degan savol ustida bahslashib qolibdi. Axyri kitob dunyodagi eng buyuk kashfiyot deya tan olinibdi. Zero, kitob barcha bilimlarni o'zida jamlab, komillikka xizmat qiladi.

tadbirni bahor va bolalik haqidagi she'rlari bilan boshladi. Quvnoq va soddasatrlardan yayragan bolalarning o'zlari ham turli badiiy chiqishlar bilan davraga yanada fayz kiritdi. Tadbir haqida ayrim tafsilotlarni 4-«B» sinf o'quvchisi Shahruxa Xolmurodovadan eshiting:

– Sevimli shoirimizning ko'plab she'rlarini yodladik. Birinchi she'rini 4-sinfida ukasiga atab yozganini bilib oldik. Ular maktabimizdagi iste'dodli o'quvchilarga yo'l-yo'riq ko'rsatdi. Bizga dasxat yozilgan kitoblaridan sovg'a qildi.

Kitob bayramida Respublika bolalar kutubxonasi tashrif buyurgan mehmonlar ham ishtirok etdi. Ular o'quvchilarni kutubxonaga taklif etib, u yerdagi qulay sharoitlar, ajoyib kitoblar haqida so'zlab berdi. «Jajji akademik» jurnali va «Tong yulduzi» gazetasi xodimlari esa bolajonlarning taassurotlarini oq qog'oz-u suratlariga muhrlab, siz mushitariylarga yetkazishdek vazifani zimmasiga oldi. Axir shunday ajoyib bayram haqida yozmay bo'ladimi?!

Sayyora QODIROVA



Shu kunlarda poytaxtimizdagi ko'pgina ta'lim dargohlarida, kutubxonalarda «Bolalar kitobi kuni» ajoyib bayram sifatida nishonlanmoqda. Poytaxtimizning Yashnobod tumanidagi 231-umumta'lim maktabi o'quvchilari bu kunni sevimli shoiralari

bilan birga o'tkazish taklifini bildiribdi. Shunday qilib, ta'lim dargohining jonkuyar ustozlari O'zbekistonda xizmat ko'rsatgan madaniyat xodimi, bolalarning sevimli shoirasi Umida Abduazimovani mehmonga chorladi. Yuzidan tabassum arimaydigan shoir

AT-TERMIZIY VORISLARI

**Har yili bahor kelganida ona zamin uyg'onib,
tabiat gullarga burkanadi. Bog'-u rog'lar
misoli kelinchakday chiroy ochadi.**

Bayram kunlari mamlakatimiz rahbarining ichki turizmni rivojlantirish maqsadida qabul qilgan Farmonlariga asosan biz ham ko'hna kentlarimizdagi muborak qadamlarni ziyorat qilish maqsadida ijodiy safarga otladik. Safar davomida Surxon diyori yoshlari va ularning qo'lga kiritayotgan yutuqlari bilan yaqindan tanishdik.

Dastlab Sherobod tumanida joylashgan Abu Iso at-Termiziy ziyoratgohini ziyorat qildik. Keling, shu o'rinda bu tabarruk inson haqida qisqacha ma'lumot berib o'tsak. Butun islom olamida Imom at-Termiziy nomi bilan mashhur bo'lgan alloma 824-yil Termiz yaqinidagi Bug' (hozirgi Sherobod tumani hududi) qishlog'ida o'rta hol oilada dunyoga kelgan. Allomaning oilasi va ota-onasi haqida bizgacha to'liq ma'lumot yetib kelmagan.

Yoshligidan ilm-fanga tashna at-Termiziy 850-yildan hadis ilmini mukammal egallash maqsadida uzoq yurtlarga safar qiladi. Imom al-Buxoriy, Imom Muslim ibn al-Hajjoj, Abu Dovud kabi o'z davrining yetuk olimlari, muhaddislaridan tahsil oladi. Imom at-Termiziy 892-yilda o'z qishlog'ida vafot etadi va shu yerda dafn etiladi. Olimning bizgacha «Al-Jome'», «Ash-shamoil an-nabavviya», «Kitob at-tarix» kabi ko'plab asarlari yetib kelgan.

Ziyoratgohga kirib borar ekanmiz, obodonlashtirish ishlarini ko'rib, qalbmizda iftixor tuyg'usi jo'sh urdi.

Bu yerda Tojikiston, Turkmaniston, Qozog'iston, shuningdek, yurtimizning turli viloyatlaridan kelgan ko'plab mehmonlarni uchratdik. Ayniqsa, kekxa onaxon-u otaxonlarimiz nabiralari bilan birga sayohatga kelganidan rosa quvondik.

– Farzandlarimizga ajdodlarimiz qanday ulug' insonlar bo'lganini doimo eslatib turmog'imiz lozim, – deydi Farg'ona viloyati, Oltiariq tumanidan kelgan Maryamxon ona Hayitova. – Shuning uchun nabiralari Zeboxon va Shahnoza-xonlarni ziyoratga birga olib keldim.

Darhaqiqat, qadim o'tmishimizdan so'zlovchi tarixiy yodgorliklarni ko'rish, boy merosimizni o'rganish yoshlarimizda milliy o'zlikni anglash tuyg'usini uyg'otadi.

Ana shunday taassurotlar bilan Muzrabot tumanidagi 12-umumta'lim maktabi sari yo'l oldik.

Mazkur muassasada Mahbuba opa Jalilova, Gulchehra Qurbonova, Olya Turopova, Nurbekxon Saidov, Jamshid Rashidov kabi 54 nafar pedagog 782 nafar o'quvchiga bilim berib kelmoqda. Maktab ostonasida bizni o'quv ishlari bo'yicha rahbar o'rinbosari Normamat aka Abisov qarshi oldi. Ular iqtidorli bolalar bilan

ijodiy uchrashuv tashkillashtirishga bosh-qosh bo'ldi. O'quvchilarning ilmga chanqoqligi, kitobga oshnoligi bizni behad quvontirdi. Ayniqsa,

kabi 45 nafar malakali ustozlar yosh avlodga ta'lim-tarbiya berib kelmoqda. Maktab hovlisi bahoriy gullar bilan bezatilgan. Sumalak, ko'k somsa,

chuchvara, yupqa kabi bahoriy taomlar bilan bezatilgan dasturxon atrofiga o'quvchilar qadimiy udumlarimizga oid bilimlarni namoyish etdi. Lapar va o'lanlar ijro etib, milliy o'yinlar va varraklar saylida o'z mahoratlarini sinovdan o'tkazdi. Sahna markazida egnida quyoshning zarrin nurlarida oltin-day jilovlanayotgan atlas va adras kiygan qizlar o'zaro bellashishayapti. Sport maydonchasida esa o'g'il bolalar milliy o'yinlarimizdan arqon tortish, yugurish, chillak va

kurash musobaqalarida o'zaro bellashmoqda. Ularga jismoniy tarbiya fani ustози Ismoil aka Xolyorov hakamlik qilib bormoqda.

– Bugungi bayram tadbiri milliy-madaniy merosimizni yoshlar ongiga singdirish, ularni Vatanga muhabbat va qadriyatlarimizga hurmat ruhida tarbiyalash maqsadida tashkil etildi, – deydi maktabning ona tili va adabiyoti fani o'qituvchisi Erkin Eshboyev.

Surxon vohasiga qilgan ijodiy safarimiz ana shunday unutilmas lahzalarga boy bo'ldi.

Jamoliddin ABDULLAYEV



43-umumta'lim maktabi o'quvchilari orasida Shahlo Esanova, Shohsanam Alyorova, Iqbol Mirzoqulov, Bibizaynab Hamzayeva, O'tkir Eshonqulov, Uzuka Xudoyqulova, Temur To'rayev, Husniya Boboxonova, Amina Mardonovqulova, Abduvohid Abdurahobov kabi bilimga tashna, ijodkor yoshlar «Bilimlar bellashuvi», fan olimpiadalarida faxrli o'rinlarni qo'lga kiritib kelmoqda.

«Yosh ijodkorlar» to'garagi a'zolari Shahlo Jabborova, Farida Norboyeva, O'g'ilshod Jabborova, Rayhona Yo'ldosheva, Durдона Habibova va Charos Bo'riyevlarning tuman va viloyat miqyosida qo'lga kiritgan yutuqlarini eshitib, ularga kelajakda yangi-yangi marralarni zabt etishlariga tilak bildirdik.

Keyingi manzilimiz Qumqo'rg'on tumani, Ko'ganli qishlog'ida joylashgan 43-umumta'lim maktabi bo'ldi. Isroil aka Boypo'latov rahbarlik qilayotgan mazkur muassasada Boyqobul aka Xatamov, Saltanat Jonqobilova, Sherali Tangriyev, Sohiba Rahmonova, Muzaffar To'rayev



MAQTANCHOQ BOLA UYALIB QOLDI

Maktabgacha ta'lim muassasalaridagi mashg'ulotlarda bolalar o'quv faoliyatining dastlabki ko'nikmalarini hosil qiladi, intizomli, odobli bo'lishga odatlanadi, diqqatni jamlay olish qobiliyati rivojlanadi.

O'rtoqlari orasida faollik ko'rsatishga intiladi, berilgan vazifalarni bajarishda tartiblilik, saranjomlik, chaqqonlikka e'tibor beradi. Rasm chizish, loy va plastilindan buyumlar yasash, birgalikda o'yin o'ynash, musiqa mashg'ulotlarida qo'shiq kuylash va raqs harakatlarini bajara olishda jamoa bilan birga ishlay olish ko'nikmasi shakllanadi.

Poytaxtimizning Sergeli tumanidagi 600-maktabgacha ta'lim muassasasining 9-tayyorlov guruhi tarbiyachisi Manzura Qo'chqorova tomonidan tayyorlangan navbatdagi tadbir aynan bolalarning iqtidorini ro'yobga chiqarish, ularni har tomonlama sog'lom bo'lib ulg'ayish yo'lida tashkil etildi. Kechada guruh tarbiyalanuvchilari hamda ota-onalar ishtirok etdi.

Bolakaylar dastlab Bahoroyini ta'riflab, unga bag'ishlangan she'rlar aytdi. Ustozning «O'qish nimaga kerak?» degan savoliga, kichkintoylar bir ovozdan «Yozishni bilish, turli o'yinchoqlar

yasash, rasmlar chizish, she'r yodlash uchun», deya javob berdi. So'ng, bolajonlar ona Vatani, baxtli bolalik, do'stlik va tinchlikni tarannum etuvchi she'rlar aytdi. Ayniqsa, Madina Sindorova, Samira G'ayratova, Kamoliddin Sahobiddinov, Behzod Madrahimov, Salima Rahmonova, Omina Abdurahmonova kabi tarbiyalanuvchilarning faol ishtiroki tadbirga kelgan ota-onalar qatori meni ham behad quvontirdi.

Shundan keyin davraga Bilmasvoy chiqib, bolakaylarga «Men sizlardan bilimliman», deya maqtana boshladi. Ammo ularning sanash, hisoblashdan bergan savollariga javob berolmay, uyaliq qoldi. U ham «Bilimi zo'r mingni yiqar» maqoliga amal qildi, shekilli, ilm o'rganish niyati borligini aytib, mashg'ulotlarni kuzatishga izn so'radi. Bolajonlar bir ovozdan bunga rozi bo'lishdi. So'ng, kichkintoylar musiqa rahbari Matluba Po'latova sahnalashtirgan o'zbek, tojik, gruzin



va rus xalqlarining sho'x kuy va qo'shiqlariga raqsga tushdi. O'z chiqishlari orqali ilm olishning nechog'li qiziqarli mashg'ulot ekanini Bilmasvoyga anglatishdi...

– Qizim bu yil maktabga chiqadi, – deydi Sevara Rahimova. – Ushbu tadbirida uning ishtirokini ko'rib, rosa sevindim. Qizim she'r yod oldi, raqs tushdi, turli topshiriqlarni epchillik bilan bajardi.

Bir so'z bilan aytganda, tadbir bolajonlarga olam-olam zavq ulashdi.

Nodira NAZAROVA

MUXTASAR SAMMITDA ISHTIROK ETDI



«Faol tadbirkorlik, innovatsion g'oyalari va texnologiyalarni qo'llab-quvvatlash yili» Davlat dasturi hamda O'zbekiston Respublikasi Prezidentining 2018-yil 2-fevraldagi «Xotin-qizlarni qo'llab-quvvatlash va oila institutini mustahkamlash sohasidagi faoliyatni tubdan takomillashtirish chora-tadbirlari to'g'risida»gi Farmoni ijrosini ta'minlash maqsadida poytaxtimizdagi Abdulla Avloniy nomidagi xalq ta'limi tizimi rahbar va mutaxassis xodimlarni qayta tayyorlash va malakasini oshirish institutida O'zbekiston Respublikasi Xalq ta'limi vazirligi hamda «Girls development club» qizlar klubi tomonidan I Respublika o'quvchi qizlar sammiti bo'lib o'tdi. Tadbirda «Ta'limga oid ijtimoiy loyihalar» yo'nalishida Namangan viloyati, Pop tumanidagi 11-DIMI 9-«B» sinf o'quvchisi Muxtasar Alijonova qatnashish baxtiga muvassar bo'ldi.

Muxtasar maktabda a'lo baholarga o'qishi va namunali xulqi bilan maktabdoshlari hurmatiga sazovor. Ta'lim maskanida o'tkaziladigan tadbirlarni o'zining yangi-yangi g'oyalari bilan boyitib kelayotgan o'quvchining bilimi, dunyoqarashi, intellektual salohiyati ushbu sammitda yana bir bor sinovdan o'tdi. U tanlov doirasida tashkillashtirilgan mahorat maktabi va seminar-treningda o'z loyihasi bilan muvaffaqiyatli ishtirok etdi. Muxtasar tanlovda sertifikat bilan taqdirlandi hamda «Eng faol qizlar» klubining hududdagi sardoriga aylandi. O'quvchi qiz endi o'z hududida innovatsion loyihalarni amalga oshirishni oldiga maqsad qilib qo'ydi.

Nurbek QIDIRALIYEV



MAKTAB BO'YLAB SAYOHAT

Poytaxtimizning Sergeli tumanidagi 264-umumta'lim maktabida ingliz tili fanidan ochiq eshiklar kuni tashkil etildi. Unda 6-, 7-, 8-sinf o'quvchilari faol qatnashdi.

Avvaliga boshlang'ich sinf o'quvchilari ishtirokida ochiq darslar, so'ng, tadbir ishtirokchilari uchun 8-«B» sinf o'quvchisi Maftuna Qobiljonova tomonidan maktab bo'ylab sayohat uyushtirildi. U ingliz tilida sinf xonalari, maktab kutubxonasi hamda fan to'garaklari bilan yig'ilganlarni yaqindan tanishtirdi. Maktab faollar zalida o'tkazilgan «Sayyohlikda til bilishning ahamiyati» nomli tadbirda til o'rganish koni foyda ekanligi ta'kidlandi. Unda 9-«V» sinf o'quvchilari ingliz tilida «Yurtimizda sayyohlikning potensial o'rni» mavzusida taqdimot qildi. 8-«B» sinf o'quvchilari ishtirokida ingliz tilida sahna ko'rinishi namoyish etildi. Shuningdek, tadbir ishtirokchilari o'rtasida interaktiv usulda so'z o'yini bo'lib o'tdi. Bellashuvda o'quvchilar o'zlarining so'z boyligini sinovdan o'tkazdi.

Zilola XALILOVA,
poytaxtimizdagi 264-umumta'lim maktabining
ingliz tili fani o'qituvchisi

Painter: Yozubek HALIMBEKOV



Tongue – is sharper than a sword.

Amir TEMUR

Lesson 15

AMIR TEMUR IS OUR PRIDE!

Our great grandfather – Amir Temur was born on April 9, in 1336, at the present Kasikadarya region, in Khujailgor village.

His father – Amir Taragay was an authoritative rich man of the region Kesh. His mother – Teguna was a clever woman.

Amir Temur learned hunting, military lessons and other subjects. Sheikh Shamsiddin taught him. He was witty, highly virtue, cautious, courageous and wise leader.

Amir Temur was seventeen, he began managing his father's state by himself. When he was born, our homeland was a part of the country which called «Chigatoi». Then, he decided to liberate the homeland from Mongol Empire.

Soon, Amir Temur began going against Mongolians. That struggle continued for eight years. Finally, freedom fighters set free and pursued the enemies from Movorounnahr. In 1370, on April 9 Amir Temur was proclaimed as the king of Movorounnahr. He appointed that Samarkand would be the capital of Movorounnahr.

The first president of Uzbekistan Islam Karimov said: «Amir Temur is our pride!»



Shahlo ABDULLAYEVA,
the pupil of the school №53 in Shakhrikhon district Andijan region

USEFUL ENGLISH

Two meaning words.

Book (N) – a printed work consisting of pages.
To book (V) – buy in advance.

Can (modal verb) – be able to do something.
Can (N) – metal container.

Spring (N) – season.
To spring (V) – to jump.

Ring (N) – a small circular band.
To ring (V) – call by telephone.

Leave (N) – permission.
To leave (V) – go away from.



Ma'mura G'ULOMOVA

Painter: Sumbula MELIMURODOVA

Funny English Test

Match the correct answer.

- | | | | | |
|-------------------------------|-----------|-------|--------|--------|
| 1. I had ... water | A long | B do | C many | D some |
| 2. What is ... number? | them | has | her | no |
| 3. ... you like some juice? | how | would | did | will |
| 4. I can ... that | out | would | will | make |
| 5. I ... food | like | would | write | could |
| 6. I see ... | him | who | its | been |
| 7. Can you write my ... ? | word | more | look | name |
| 8. I ... to see you. | go | see | than | first |
| 9. Can you ... ? | may | can | said | write |
| 10. I ... her mother. | this | go | she | see |
| 11. My mother cooks ... food. | delicious | well | good | nice |



Dinora ABDULLAJONOVA

O'zini hurmat qilgan odam boshqalarni ham izzat-ehitromga o'rgatadi.

L. VOVENARG

Tong yulduzi



Dilshod RAJAB, bolalar shoiri
BAHOR ALYORI

Qish qahrini so'ndirib,
Ayoqdan g'olib kelgan.
Osmonlarni to'ldirib,
Guldirak cholib kelgan.
Kamalak olib kelgan,
Kapalak olib kelgan.
Qozonlarni to'latib,
Sumalak solib kelgan.
Ko'klamoyim, marhabo,
Ko'rkamoyim, marhabo.
Qarang, uchar varraklar,
Baland uchar varraklar.
Oppoq orzular kabi,
Ko'kni quchar varraklar.
Mahliyo boqar bizga,
Hatto osmon falaklar.
Bolalar sheryuraklar,
Qizaloqlar malaklar.
Ko'klamoyim, marhabo,
Ko'rkamoyim, marhabo.

BOLALAR - SHOIRGA

O'zbekiston xalq shoiri
Anvar OBIDJONGa

Biz mushtoqmiz va o'rtoqmiz
kitob-she'rga,
Shu sababdan mehrimiz zo'r
«Ona yer»ga.

Bilamiz «Bahromning hikoyalari»ni,
Goh jiddiy, goh hazil-kinoyalarni.

Eshitganmiz o'ktam gap-u so'zlarini,
Dono «Olovjon va uning do'stlari»ni.

Bizni dildan yayratib xo'p kuldiradi.
«Masxaraboz bola»ning sho'x qiliqlari.

«Jajji-jajji kulchalar»ning mazasi zo'r.
Qay birini ham aytaylik – hammasi zo'r.

...Bizga yana she'r bog'idan gullar tering,
«Juda qiziq voqea»lar aytib bering.

YASHIL QO'ZG'OLON

Yashil qo'zg'olon borar,
Bu kun butun borliqda.
Bosh ko'tarib maysalar,
Chiqdilar ozodlikka.

G'aflet xobida yotgan,
Daraxtlar ham uyg'ondi.
Ariqlarda muz qotgan,
Tutqun suvlar to'lg'ondi.

So'ngsiz kengliklar bo'ylab,
Kurash etmoqda davom.
To'p otilar zarbidan,
Gumburlab ketar osmon.

...Huv, olis dovonlarda,
Hamon olg'a borarlari.
Belansa-da qonlarga,
Isyonchilar – lolalar!

TEMUR HAMDA TEMURBEKLAR

(Sohibqiron bobomiz tavalludining
682 yilligiga bag'ishlanadi)

Tarix sahnasida dovrug'i ketib,
Vatan himoyasi, shonli qadamlar.
Mo'g'ullar lashkarin chilparchin etib,
Ozodlikka chiqdi mazlum odamlar.

Temuriylar keldi, o'zbek Bek bo'ldi,
Nomlari jarangdor Temurbek bo'ldi.
Ovro'pa, Osiyo, Afriqoni ham,
Qayta tartib qilgan Temurbek bo'ldi.

Tarix o'zbek nomini unutmagay hech,
Boisi, o'zbekda ko'pdir Temurbek.
Endi u qilichmas aql kuchi-la,
Urushlar nomiga qo'yajakdir chek.

Gulshanoy ORTIQOVA,
Namangan viloyati, Yangiqo'rg'on
tumanidagi 2-umumta'lim maktabining
ona tili va adabiyot fani o'qituvchisi



N. SHAVKATOVA chizgan rasmi

PORLA, QUYOSH!

Kun ham o'tib, tun ham keldi,
Osmon to'ldi yulduzga.
Quyosh ketib shamol yeldi,
Tik qarayman yulduzga.

Quyosh charchab uxlab qoldi,
Tog' ortidir par bolish.
Chigirtkalar chirillaydi,
Yoqib tushar bu xonish.

SOHIBQIRON BOBOM

Temur bobom yengilmas,
Kuchi, dono, pahlavon.
Uni tan olgan jahon,
U erur Sohibqiron.

Yurt haqida o'yilagan,
Ozodlikni ko'zlagan.
Adolatdan so'yilagan,
Kelajakka har qachon.

Temurbeklar maktabi,
Yigitlarning matlabi.
Der yurtimning rahbari,
U bo'lsin doim omon.

Ilhomjon IKROMJONOV,
Andijon viloyati, Baliqchi
tumanidagi 44-umumta'lim
maktabining 5-«A» sinf
o'quvchisi



A'LOCHI BO'LISH KERAK

5 Qanday mazza, qanday soz,
5 A'lochi bo'lsang o'zing.
5 Beshlaring ham ko'p bo'lib,
5 To'rtga tushmasa ko'zing.

Ba'zi o'quvchilarning,
Ikki uchi ko'p bo'lar.
Kundaligin ichida,
Past baho to'p-to'p bo'lar.

A'lochi bo'lish uchun,
Jon berib o'qish kerak.
Ustozlarning o'g'in,
Yaxshilab uqish kerak.

Gulchiroy SULTONBEKOVA,
Toshkent shahar, Yakkasaroy
tumanidagi 48-umumta'lim
maktabining 8-«B» sinf
o'quvchisi

UKAJONIM

Mehribonim opajon,
Deganda ukam har on.
Qalbim jo'shib ketadi,
Mehrim toshib ketadi.

Ukajonim pahlavon,
Bo'lsin doim mard o'g'lon.
Yurtga foydasi tegsin,
Qalbidagi urur to'lsin.

Zarnigor BOTIROVA,
Toshkent shahar, Yunusobod
tumanidagi 97-umumta'lim
maktabining 8-«D» sinf o'quvchisi

«NABIRAMGA MAKTUBLAR» TURKUMIDAN

(Davomi. Boshi o'tgan sonlarda)

Nabiraginam, hech kuzatganmisan, nima uchun bobojon va buvijonlar ko'proq nabiralari bilan chiqishadi, ular bilan non-qatib bo'lishni yaxshi ko'radi? Sababi, qariganda o'zlari ham bolatabiat bo'lib qoladi-da. Qara, tunov kuni buving bilan mehmondorchilikdan kelayotgan edik. Bir hovlida oq tut g'arq bo'lib pishibdi, degin. Buving, voy, dedi-yu yurolmay turib qolsa bo'ladimi... Qo'yib bersam, darvozani taqillatib kirsam-yu, tut yesa. Bola ham bironing daraxtida o'rikmi, gilosmi ko'rib qolsa, o'bering, deb xarxasha qiladi-ku. Buving ham shunga o'xshab qoldi. «Bozordan bir tog'orasini obkelib beraman», deb uyga bazo'r obkeldim.

Uyga kelib, nimani ko'rdik degin, bitta savatchada durdek tovlanib turgan oq tutni. Ana endi buvingni xursandligini ko'rsang. Axir hozirgina yetisholmagan narsasi kutilmaganda ko'z oldida tursa, ajab-da. «O'g'ilginam obkelib, tashlab ketibdi, tutni yaxshi ko'rishimni bilardi, baraka topkur», deb adangni rosa alqadi. Bir o'rgilgandan ming o'rgildi. Duolar qildi.

– Omonlik-somonlik, hech ko'rmaylik yomonlik, yanagi yillarga ham pishiqchiliklarga yetkazsin, esingizdami, chol, iliguzuldi paytlarida, tut pishig'iga yetvolsak o'lmaymiz derdik, – deb o'tmishimizni ham eslab qo'ydi.

Shu payt sen singlingni bog'chadan olib kelib qolding.

– Voy, kelinglar asallarim, tut yeymiz, – dedi buvinglar sizlarga ham ilinib.

– Yeyave-
ring, buvijon,
men rosa
to'yvoldim, –
deding sen.
– Voy, qa-
chon, qayer-
dan to'yvoldim,
bolam, – dedi

Erkin MALIK,
O'zbekiston Respublikasida
xizmat ko'rsatgan jurnalist



MEHR

buving.
– O'zim obkeldim-ku, buvijon, o'rtog'imnikidan. Oq tutni yaxshi ko'rishizni bilardim, shunga...

Sen e'tibor qilmading, nabiraginam. Buvijoning shoshib ro'molini ko'ziga bosdi. Yelkasi bir, ikki uchdi. Ha... yig'lab yubordi, bechoragina. Nafaqat buving, qilgan ishingandan menam to'qlinlanib ketdim, toy-chog'im. Danagidan mag'izi shirin, deganlari shu-da. Qachondir buving gap orasida oq tutni yaxshi ko'rishini aytdiganlar-u, eslab qolganingni qara, ziyrakkina bolam.

Shunaqa, sizlar qanchalik mehrtalab bo'lsanglar, biz qariyalar ham shunchalik mehrtalab bo'lib qolamiz. Ayniqsa, mehribonlik nabiralardan bo'lsa, boshimiz osmonga yetadi. Biz uchun bir savat dur nima-yu, bir savat oq tut nima, bir savat tilla nima-yu, bir savat tilladek o'rik nima, farqi yo'q.

Ey, mehribon bolajonim, hayotda mehridaryo bo'laver, mehr ko'rsatganlar mehr ko'radilar, hech qachon kam bo'lmaydilar...

(Davomi bor)

HALI BUNAQASI BO'LMAGAN,

- deydi Respublika «Barkamol avlod» bolalar markazi rahbari Xadicha ZOKIROVA.

Gap shundaki, ijodiyot markazi to'garagi a'zolarining bir guruhi 31-mart kuni Toshkent viloyati, Parkent tumanidagi so'lim So'qoq qishlog'ida mega varrakni osmon-u falakka uchirdi. Bo'yi 3 metr-u 10 santimetr, eni 2 metr-u 75 santimetrga teng bo'lgan, Respublika BABMning logotipi tushirilgan varrak oz emas, ko'p emas, 200 metr balandlikka ko'tarildi.



Fotoapparatga muhrlangan mega varrakning uchirish jarayonini sizlarga ham ilindik.

- Abdunabi Xojiboyev bilan birgalikda yasagan varragimiz osmonga ko'tarilganida, quvonganimizdan chapak chalib yubordik, - deydi poytaxtimizdagi 44-umumta'lim maktabining 8-sinf o'quvchisi, markazning aviamodel to'garagi a'zosi Isroil Bahodirov.

- Hajmli varrakni yasashida bizning ham hissamiz borligidan mamnunmiz. «Qizlar ham varrak uchiradimi?», deysizlaringiz mumkin. Ammo bunisi o'zgacha-da, - deydi Chilonzor tumanidagi 200-umumta'lim maktabining 8-sinf o'quvchilari Muxlisa Ismoilova va Durдона Muhammadjonova.

Bolajonlar, agar siz ham shunday varrakni ko'kka uchirishni orzu qilsangiz, unda shoshiling. Lola opa To'xtayevaning aytishicha, shu oying oxiriga qadar joylardagi «Barkamol avlod» bolalar markazlarida varraklar musobaqasining tuman, viloyat bosqichlari o'tkazilarkan.

Ozoda TURSUNBOYEVA



Poytaxtimizning Yunusobod tumanidagi 272-umumta'lim maktabining 7-«B» sinf o'quvchilari sinf rahbari Busora Usmonova boshchiligidagi tadbir o'tkazdi. Kechada o'quvchilar raqslar guldastasi-yu hajviy chiqishlarni yig'ilganlarga taqdim etdi. Qolaversa, bahor fasli, undagi bayram va taomlar haqida ingliz tilida ma'lumotlar berdi. Tadbir varrak uchirish musobaqasi bilan yakunlandi.

FUTBOLCHILARIMIZ PESHQADAM

Poytaxtimizning «Lokomotiv» futbol jamoasi yurtimizdagi yetakchi klublardan sanaladi. Jamoaning turli yosh toifasidagi tarbiyalanuvchilari mahalliy va xalqaro miqyosda o'tkaziladigan nufuzli musobaqalarda munosib ishtirok etib kelmoqda.



Shu kunlarda olis Turkiya mamlakatida futbol bo'yicha yirik «Sidestar» turniri bo'lib o'tmoqda. Musobaqada Rossiya, Germaniya, Ozarbayjon, Ruminiya, Gruzziya, Qozog'iston, Turkmaniston, Suriya mamlakatlari futbolchilaridan tashqari yurtimiz yosh charmtop ustalari ham g'oliblik uchun bahs olib bormoqda.

Ilk turda Erkin Saidov boshchiligidagi «Lokomotiv - 1» jamoasi Moskva shahrining xuddi shu nom bilan ataluvchi klubi tarbiyalanuvchilariga qarshi maydonda saf tortdi. Quvonarlisi, ushbu qarama-qarshilik gollarga boy bo'lib, yakunda futbolchilarimiz raqiblarini yirik 9:4 hisobida taslim etdi. «Lokomotiv - 2» esa Gruzziyaning Batumi shahri sharafini himoya qilayotgan «Ajariya» klubiga qarshi to'p surdi. Keskin va murosasiz kechgan ushbu bahsda o'zbekistonlik yosh charmtop ustalarimiz 5:2 hisobida g'alaba qozondi.

Sarvar Otaboyev boshchiligidagi «Paxtakor» futbol klubining U-9 jamoasi ham Rossziyaning Sochi shahrida bo'lib o'tayotgan Valentin Bubukin xotira turnirida ko'tarinki ruhda ishtirok etmoqda.



Yoshlarimiz ilk turda «Dagomis» klubi tarbiyalanuvchilarini yirik 4:1 hisobida taslim etib, musobaqa chempionligi uchun asosiy da'vogar ekanini ko'rsatdi. Bahsda umidli futbolchimiz Jamshid Orziqulov dubl qayd etgan bo'lsa, Bekzod Qobulniyozov va Bilol Qurbonov o'z hisobiga bittadan gol yozdirib qo'ydi.

Ikkinchi turda yosh paxtakorchilar «Viborjanin» jamoasi vakillarini 3:0 hisobida mag'lub etdi. Endi paxtakorchilar «Jemchujina - 1» va «Nart» jamoalariga qarshi to'p suradi.

Sa'dullo TURSINOV

Joriy yilning 26-27-mart kunlari Toshkent viloyatining Bo'stonliq tumanida joylashgan «Yoshlar» oromgohida oliy ta'lim muassasalari talabarlari o'rtasida yo'l to'sig'idan o'tish bo'yicha musobaqa o'tkazildi.

TALABALAR BELLASHDI

Bellashuvda respublikamizning har bir viloyatidan 10 nafardan talaba-sportchi ishtirok etdi.



Bahslar O'zbekiston Respublikasi Jismoniy tarbiya va sport vazirligi tomonidan tayinlangan 20 nafar hakam tomonidan baholab borildi. Musobaqa yakuniga ko'ra, 1-o'rinni Toshkent viloyati, Chirchiq davlat pedagogika instituti jamoasi egalladi. Sirdaryodan kelgan Guliston davlat universiteti sportchilari 2-, Buxoro davlat universiteti jamoasi esa 3-o'rinni qo'lga kiritdi.

G'oliblar O'zbekiston yoshlar ittifoqi hamda homiy tashkilotlarning diplom, faxriy yorliq va esdalik sovg'alari bilan taqdirlandi.

Shohruh MUSAYEV





MEHRIXON O'QITUVCHI BO'LMOQCHI

- Abdulla Qodiriyning «O'tkan kunlar» romanini o'qib chiqqanidan buyon Kumushbibiga o'xshashni orzu qilaman. Asardagi bosh qahramonning ba'zi so'zlarini yod olganman, - deydi Mehrixon.

BO'SH O'TIRMAI, BOSH QOTIR!

«SOHIBQIRON BOG'LARI» KRIPTOGRAMMASI

Shakl kataklaridagi raqamlarda buyuk Sohibqiron Amir Temur davlatining poytaxti Samarqand atrofidagi eng mashhur bog'larning nomlari yashiringan, ularni quyidagi kalit so'zlar javoblari orqali bilib oling.

1. Amir Temur bog'larini yanada obod qilgan buyuk falakiyotshunos alloma, temuriyozda hukmdor - 16, 5, 16, 12, 8, 13, 15.
2. Sohibqiron bog'lari o'rta asr rassomlari tomonidan asarlarida aks ettirilgan tasviriy san'at sohasi - 7, 4, 2, 4, 1, 11, 18, 16, 14, 1.
3. Bog'larga ko'rk beruvchi umriboqiy sersoya daraxt - 20, 4, 2, 3, 14.
4. Bog'larga manzara uchun ekiladigan xushbo'y o'simlik - 14, 1, 18, 10, 3, 2.
5. Oldi tomoni ochiq, ko'rkam yozlik bino - 1, 18, 19, 3, 2.
6. Tanasi qattiq, doim yashil, tik o'suvchi janub daraxti - 9, 1, 7, 9, 3, 6.
7. Bir yillik xushbo'y oshko'k o'simlik - 17, 1, 2, 8, 4, 5.

Tuzuvchi: Foziljon O'RIPOV

8	3	12	4	2	1	19	*****							
*****				20	4	2	3	14	*					
*****				9	1	7	3	5	*					
*****				8	1	5	1	2	6	*				
*****				8	13	10	4	9	11	*				
*****				7	1	18	6	3	2	*				
*****				6	4	5	15	16	9	3	*			
*****				17	1	10	3	2	2	1	7	3	*	
*****				6	1	19	5	1	11	7	1	2	8	*

Uzun sochini mayda o'rgan, nimtabassumi bilan sevimli asarimiz qahramonini eslatuvchi qizaloq bilan suhbatimiz shu tariqa boshlandi.

Mehrixon Ortiqova O'zbekiston Respublikasi Xalq ta'limi vazirligi tasarrufidagi filologiya fanlariga ixtisoslashgan davlat umumta'lim maktabining 6-«F» sinf o'quvchisi. Uning adabiyotga mehri baland. Navoiy, Bobur g'azallaridan tortib, Abdulla Oripov, Erkin Vohidov, Muhammad Yusuf she'rlaridan bir qanchasini yod olgan. Iste'dodli tengdoshingiz ham bo'sh vaqtda ijod bilan shug'ullanadi. Ona tili va adabiyot fani o'qituvchisi Nazokat opa ko'magida she'r, ertag-u hikoyalar mashq qiladi. Shuningdek, qahramonimiz ingliz tilini mukammal o'rganishni maqsad qilgan. Sportga ham ishtiyoqi baland Mehrixon sinxron suzish bo'yicha «Nafosat olami» sport festivali va respublika chempionatlarida sovrinli o'rinlarni egallagan.

Ustozlariga havas qiladigan qizaloq kelajakda o'qituvchilik kasbini egallash niyatida. Biz esa orzulari osmon qahramonimizga yuksak parvozlar tilaymiz.

QIZLARXON

FOYDALI MASLAHATLAR

- 1 Tishlaringiz hamisha oppoq bo'lib, yarqirab turishini istasangiz, siqib olingan limon sharbatiga paxtani botirib, u bilan bir haftada 3 marta tishlaringizni arting.
- 2 Tovuq go'shtini qovurishdan 5 daqiqa oldin sovuq suvga solib qo'ysangiz, u qip-qizil bo'lib pishadi.
- 3 Un va guruch saqlanadigan idishga mix yoki shunga o'xshash metall parchasini solib qo'ysangiz, unga mita tushmaydi.
- 4 Tuxum oqining tezroq ko'pirishini istasangiz, unga bir chimdim tuz tashlang.
- 5 Rediskani iste'mol qilishdan oldin 15 daqiqa suvga ivitib qo'ying.
- 6 Uy ichidagi yoqimsiz hidni yo'qotish uchun qog'ozga solingan ozgina qahvani biror joyga tashlab qo'ying.
- 7 Soyabonlarni yarim ochiq holda sodali suvga solib, chyotka yordamida yuvish lozim. Shundan so'ng ochild, iliq suvda chayish kerak.

QIYMALI PIROG

Kerakli masalliqlar: 200 gramm qiyma, 2 dona kartoshka, 50 gramm sariyog', 1 dona bulg'or qalampir, 50 ml o'simlik yog'i, 2 dona pomidor, 150 gramm pishloq, 100 gramm smetana, ta'bga ko'ra tuz.

Tayyorlanishi: kartoshka tuzli suvda qaynatiladi. Pishgach, sariyog' qo'shib eziladi. Maxsus aylana qolipga yoyilgach, 10 daqiqa sovitgichga qo'yiladi. Qiyma uchun piyoz va bulg'or qalampirini alohida to'g'rab, yog'da qiyma bilan birga qovuriladi. Pomidor to'g'raladi, pishloq esa qirg'ichdan chiqariladi. Sabzavotlar va qiymani aralashtirib, kartoshkali bo'tqa ustiga bir tekisda solinadi va pishloq sepiladi. So'ng, qizigan gaz pechiga 20 daqiqaga qo'yiladi. Pishgandan so'ng dasturxonga smetana bilan tortiladi.

Yoqimli ishtaha!

NARGIZA tayyorladi

9-aprel 2018

Tong yulduzi
Muassis:
O'zbekiston Respublikasi
Xalq ta'limi vazirligi

Bosh muharrir
Feruza ADILOVA
Gazeta O'zbekiston
Matbuot va axborot
agentligida
0208-raqam bilan 2007-yil
2-fevralda ro'yxatdan
o'tgan.

TAHRIR HAY'ATI:
Qahramon QURONBOYEV,
Dilshod KENJAYEV,
Alisher SA'DULLAYEV,
Laziz TANGRIYEV,
Murtazo SULTONOV,
Feruza JALLOVA,
Ashurali JO'RAYEV
(Bosh muharrir o'rinbosari),
Feruza MATYOQUBOV
(mas'ul kotib)

Navbatchi muharrir
Jamoliddin ABDULLAYEV
Rassom
Feruzbek KAMOL o'g'li
Sahifalovchi-dizayner
Shaxobiddin
MAXMADIYEV

«O'zbekiston» NMIU
bosmaxonasida chop etildi.
Manzilibiz va bosmaxona
manzili:
Toshkent shahri,
Navoiy ko'chasi, 30-uy.
Indeksi: 100011.
Obuna indeksi: 198.
e-mail: info@tongyulduzi.uz
www.tongyulduzi.uz
Adadi - 66622
Buyurtma - V 1405

Tahririyatga kelgan barcha
qo'lyozmalar tahrir qilina-
di, mualliflarga qaytaril-
maydi.
Shakli A-3, 2 bosma taboq.
Bahosi kelishilgan narxda.
Gazeta haftaning dushan-
ba kuni chop etiladi.
Topshirish vaqti - 18:00
Topshirildi - 18:00
Tel./faks:
(99871) 244-63-08